



DEMOKRAATIT

UPA 2026/87
8/6-2026
Vivian Motzfeldt

Kalaallit Nunaanni Namminersorneq pillugu inatsit naapertorlugu, Kalaallit Nunaannut imminut naalagaaffittut oqartussaaffigilernissaanut isumaqatigiissut qagugu, Inatsisartut akuersissuteqarnissaat siunertaralugu Inatsisartunut agguanneqartussatut saqqummiussaqaarnissaanut, piffissaritinneqartussamut missiluiteqarnissamut Naalakkersuisut peqquneqarnissaat Inatsisartut aalajangiiffigisassaattut siunnersuut.
(Inatsisartunut ilaasortaq Pele Broberg, Naleraq)

Inatsisartunut ilaasortap Pele Broberg-ip, Naleraq, siunnersuutaanut qujalluta Demokraatiniit imaattumik oqaaseqaateqassaagut.

Siunnersuuteqartup kissaatigaa Naalakkersuisut nunatta naalagaaffittut oqartussaaffimmik tigusinissaannut ersarissumik piffissalersukkamik saqqummiussissasut, saqqummiussarlu taanna Inatsisartunit taasissutigineqassasoq.

Demokraatiniit Naalakkersuisut akissuteqaataat paasilluarparput, apeqqutit annertuut namminiilivinnissamut attuumassuteqartut mianersortumik ingerlanneqassasut isumaqatigaarput, pingaarnerpaatulli innuttaasut qulequttami peqataatinneqassasut, innuttaasut avaqqutiinnarlugit aaliangiinerit peqqunagit.

Pingaaruteqarpoq nukissatta pitsaasumik isumatusaartumillu atorneqarnissaat, maanna Namminersorneq Pillugu Inatsip § 21-iat sukumiisumik qulaajaasoqaqqullugu apeqqutillu akissutissaalatsitatta ersarissumik paatsoorneqarsinnaanngitsumillu qulaajarneqarnissaat siunertaralugu isumalioqatigiissitamik pilersitsisoqarnikuuvoq, isumalioqatigiissitallu sulinera upernaq manna aallartinneqarnikuulluni. Tamatta aamma eqqaamavarput Inatsisartut, Inatsiseqarnermut ataatsimiititaliaq aamma Naalakkersuisut ukiumik ataatsimik piffissaliinikummata isumalioqatigiissitap suliaminik ingerlatsinissaanut.

Nikallornartuusarpoq nunatta namminiussuseqarneranik annertusaasoqarsimanginneranik sulisoqarsimanginneraalluni oqaatsit maani oqaluttarfimminngaanniit piviusuusaartitsilluni



DEMOKRAATIT

annissuunneqartartut tusaallugit. Pissutsit piviusut allaapput. Qinigaaffik kingulleq massakkullu qinigaaffik Naalakkersuinikkut naligiittut Naalagaaffeqatigiinnissaq angorusullugu suliarpassuit ingerlanneqarsimapput ingerlanneqarlutillu. Suliat tamaviaarnerillu naleerutsinniarneqartarnerat assorsuaq uggornartarpoq, piviusuunngimmatami. Assersuutigisigu Issittumut aallartitaq, Issittumi Siunnersuisooqatigiit aallartinneqarmatali nunatta issittumut aallartitamik nammineq toqqaasariaqarneranik noqqaassuteqartuarsimamera kiisami qinigaaffiup siuliani anguarput. Maanna Issittumut aallartitarput Qallunaat Savalimmiormiullu tamaasa aamma sinnerlugit nunat Naalagaaffissuit issittumi sineriallit suleqatigiinneranni tamani siuttuuvoq.

Maanna Qallunaat nunaanni naalakkersuisunngortut oqaatigaat, "Naalagaaffeqatigiit naligiissut"-mik qulequtsiillutik oqariartuuteqarput. Ersarissumik naqissuserneqarpoq, Nunat pingasut akornanni attaveqatigiinneq ataqqeqatigiinnermik allannguissamullu piumassuseqarnermik, aamma ataqqeqatigiilluni avammut saqqummertarnissamik oqaasertaliiffiqineqarpoq. Tassunga killiffeqarneq nammineq takkuttuunngilaq, ukiuni arlaqartuni uteriisaarnikkut, paasineqarnissamik kissaateqarnikkut, naligiissumik pineqarnissamik uteqqiattumik sorsuuteqarnikkut ilusinikkiartortuupput, imaappoq namminneq takkuttuunngillat uteriisaarlunili sulinermik killiffiullutik.

Taamak oqareerluta Naalakkersuisut nunatsinni nammitsinnik oqartussaassuseqarnerput tamatigut annertusarlugu sulissasut kaammattussavagut tunuliaqutserlugillu, nunanut allanut oqartussaaffik, nammitsinnik nunanik allanik oqaloqateqarsinnaanerput naggataatigullu tamakkiisumik nammitsinnik oqartussaaffimmik tigusinissarput siunnerfigalugu sulissasut tamatta kissaatigaarput, taamaaliornissaannullu tunuliaqutaanerput ersarissumik takutissagipput kaammattuutigerusupparput.

Taamak oqaaseqarluta inatsisartut qulangerlugit Naalakkersuisut Naalagaaffinngornissamut piffissalersuisumik saqqummiussaqaqarnissaat tulluartuusorinagu, suliallu isumaqatigiissutigalugit ilaatigut isumalioqatigiissitaq aqqutigalugu ingerlanneqareermata, aaliangiiffigisassatut siunnersuut itigartitsissutigineqassasoq innersuussutigaarput.